

地學以圖為要廷精於測繪者分經緯開方里辨氣候庶幾尺地寸天
皆入版宇兵事民事乃有依據今不及辨矣姑就舊志及採訪者記之
州治居赤道以北三十七度北京午綫以東三度有半省城午綫以東
二度五十分萊州府午綫以東十分以人行里計距省城六百四十里
距府城一百里東至萊陽境七十里西至昌邑境七十里南至膠州
境七十里西南至高密境八十里東南至即墨境九十里東西廣一
百五十四里南北長一百二十八里

州城周圍三里三門四闕六廂城中除祀典廟外有后寺后寺者
在前朝圓明寺之后也又有蔡狀元坊城外有崇德宮道士馬
鈺修真處又有王將軍廟在西闕乾隆間知州王化南改圓明寺
為膠東書院今設研究勸學二所內附初級小學堂二西闕路北有
高等小學堂因考院而改為之傳習所附焉東西闕有初級小學堂
各一城之東南角外有美國男女學堂各一係耶穌教

附州城分為六廂曰正東廂正西廂其四廂以隅分無正南正北廂廂之
外為鄉共分十鄉各設長自同治間始似仿古鄉官之義有一鄉
兩長者近添設益多訟益猥雜夫羣學之不講自治之不公
愛力既乖長於何有哉

門村鄉在城正西十八里領社十二東界正西廂西界官亭鄉北界待
駕鄉南界蓼蘭鄉其市鎮曰門村曰白埠曰東莊古蹟曰棠田舊名
齊棠公故城孟子將復為穀棠即此地寺廟曰張村廟官立初級小學
堂一在門村民立者一在孫家窩

待駕鄉城西北三十里領社十二東界李仙鄉西界官亭鄉南界門村鄉
北界長樂鄉其市鎮曰高聖山曰店子曰張舍古蹟元懷遠大將軍李恕墓
在馬家庄明察院故址在蘇村元明威將軍崔澍墓在昌里孝感橋
在羞魚村前跨芝陽河元孝子王黑兒卧冰處官立初級小學堂二一
在店子一在高聖山

長樂鄉在城西北六十里領社十二東界雲山鄉李仙鄉西界甯公鄉南界
待駕鄉北界掖縣境其市鎮曰灰埠曰城子曰磐石州同署在灰埠今廢圮
灰埠之西有漢平度故城遺址磐石社有上清觀金時范志敦羽化處
城子即漢盧鄉故城之地東有之萊山秦始皇祀日主處天柱石門等山有
鄭光州石刻官立初級小學堂一在長樂

甯公鄉舊名甯城鄉城西六十里領社十三東界官亭鄉西界膠萊河昌邑境
南界官亭鄉北界長樂鄉其市鎮曰新河曰官庄曰辛安古蹟有甯威冢
相傳威帥師伐萊殂於軍士卒以甲裳裹土起冢於嶺之顛今嶺土
白冢土黑上曾有雙表表陰雨則化為松虬枝蟠舞今無矣新河石梁百

二十弓為官驛孔道今漸圯瓦廟口石梁四十二弓跨膠萊河尚鞏
固明家店子橋一名呂橋與瓦廟口橋等官立初級小學堂二一在新
河一在古莊

官亭鄉城南七十里領社十一東界門村鄉西界昌邑境南界高密境東
北界寧公鄉待駕鄉其市鎮曰張哥庄曰亭口亭口本巨鎮元明時皆設
巡檢蓋萊河運道在焉今為赴高密路必經之地又變衝繁矣韓村之東有三戶
山漢宣帝以方士言祀三戶山於下密即其地石梁二一在石佛院一在大成皆
跨膠萊河官立初級小學堂一在亭口

蓼蘭鄉城南西南四十里領社十二東界橫嶽鄉金錢鄉西界官亭鄉南
界橫嶽鄉北界門村鄉其市鎮曰蓼蘭曰邱西邱西有明察院節署遺
址蓼蘭焦氏家有苦竹吸鴉片者珍之尤物非義則生禍動植比自然矣
祠廟有玉皇廟蓋淫祀光緒二十九年四月災焚死百餘人今宜將廟產
改入學堂橋梁有望竿壩之石梁焉為赴膠州要路官立初級小學一民
立者二皆在蓼蘭

橫嶽鄉城南七十里領社十六東界金錢鄉西界蓼蘭鄉南界官亭鄉北
界門村鄉其市鎮曰蘭底曰沙梁古蹟有分水嶺公婆廟祠宇白河廟
蘭底有小清河石橋官立初級小學堂一在汀嶽邱公立者一在蘭底
金錢鄉城東四十里領社十二東界萊陽境西界蓼蘭鄉南界橫嶽鄉

北界李仙鄉其市鎮曰麻樂曰冷哥店曰古縣古縣即樂毅城故址古縣之外有屯糧埠運糧河皆樂毅伐齊古蹟附近有朱毛村即墨故城也漢膠東康王封此又名康王城其外有膠東康王墓康陵寺蓮池蓮池者康王種蓮處又有洗心河即沅河俗名小姑河河畔有二貞臺前漢二貞女洗心處今沙水猶赤而金錢山東則有王驩冢焉官立初級小學堂一在古縣

李仙鄉城東北二十里領社十三東界金錢鄉雲山鄉西界門村鄉南傳於城廂北界雲山鄉市鎮曰崔趙古蹟有公沙穆墓祠廟之大者在鐵柵城北十二里有油匠橋官立初級小學堂一在十里堡

雲山鄉城東北七十里領社十二東界萊陽境西北界長樂鄉李仙鄉南界李仙鄉北界掖縣境東北界有掖平招萊四界陵其市鎮曰祝溝古蹟有太子書堂康王女墓祠廟有雲山觀鄉之東北有村名崔甸其地產金礦官立初級小學堂一在石樓店子

本境為鄉者十為社者一百二十五合在廂庄村十五共村庄一千三百零五東帶姑尤西控膠萊北據萊山南臨濰養三齊之左巍然一都會也昔負形勝西向以爭今失險阻海門東啟不自治以為強民氣蕭弱即

朝廷改官易制而進化未卜實啟我心猶嗚嗚也藏富於民而學以從政後起之亦尚加之意哉